



Bekto Precisa iz Goražda i Bukhamseen Holding iz Kuvajta su potpisali ekskluzivni ugovor o plasmanu proizvoda goraždanske kompanije u zemljama Bliskog Istoka. Značaj ovoga ugovora je višestruk posebno ako se ima u vidu činjenica da je ovo bogato tržište u stalnoj ekspanziji a da je plasman bosanskih proizvoda na njemu do sada bio gotovo zanemariv. U ime kompanije Bekto Precisa ugovor je potpisala generalna direktorica Enisa Bekto a u ime Bukhamseen Grupacije Dr. Šefik Altimimi, ekonomski savjetnik i Ahmed Alsader, finansijski direktor.

-Politika Buhamsin grupacije je da širi svoj biznis na Bliskom istoku, ali i širom Evrope. Ovaj ugovor sa Bekto Precisom je rezultat te politike i širenje na Evropu počinjemo sa BiH. Kao

partner sa Bekto Precisom širićemo prodaju svih proizvoda i nadamo se da je ovo tek prvi ugovor u BiH, a porodici Bekto se zahvaljujemo jer nas je dočekala kao da smo njeni članovi – kazao nam je Šefik Altimimi.

– Ovo je prvi korak ka arapskom tržištu i on otvara nova radna mjesta, nova područja, jer do sada smo bili prisutni samo na tržištu zapadne Evrope – ističe generalna direktorica „Bekto Precise“ Enisa Bekto.

Naime, nakon višemjesečnih pregovora i proučavanja proizvoda iz proizvodne palete jedne od najuspješnijih kompanija u BiH, Bekto Precise, jedan od najvećih kuwaitskih holdinga, odlučio je potpisati ugovor o ekskluzivnom predstavljanju, promociji i prodaji alata za industrijsku proizvodnju, kao i unutrašnje, ulične i industrijske LED rasvjete, elektro ormara za mjerenje utroška električne energije, mjernih satova za potrošnju vode, različitih sklopki i konektora koji se koriste u elektro-industriji, sjedišta za stadione, dvorane i druge prostore ali i specijalnih proizvoda prema zahtjevu kupaca iz regiona Bliskog Istoka. Bukhamseen Holding je u privatnom vlasništvu porodice Bukhamseen i jedna je od najmoćnijih biznis grupacija u Kuvajtu ali i u širem okruženju.

Grupaciju čine 42 kompanije u stopostotnom ili većinskom vlasništvu porodice Bukamseen u oblasti investicija, bankarstva i finansija, trgovine, građevinarstva, industrije čelika, nekretnina, lanca luksuznih hotela i restorana od 5 i 7 zvjezdica, printanih medija, turizma i zastupanja svjetski poznatih proizvođača satova i skupocjenog nakita. Porodični biznis ima tradiciju dužu od pola stoljeća a vode ga otac i četiri sina. Bukhamseen grupacija je iskazala interes i za investiranjem u Bosni i Hercegovini pa ovaj ugovor ima i još jednu dimenziju više jer će se partnerstvo i poslovna saradnja između ove dvije kompanije odvijati paralelno u dva smjera i u BiH i u Kuvajtu.



Izvor : gorazdeonline.ba